

I

68 349

QVÆSTIO MEDICA.

QVODLIBETARIIS DISPVATIONIBVS

MANE DISCVTIENDA

IN SCHOLIS MEDICORVM,

die Iouis xxv. Ianuarij.

M. CAROLO BRISSET.

DOCTORE MEDICO, PRÆSIDE

Est-ne Medicus sensualis Physicus?

I.

HOMO ad intelligendum natus, vt rerum omnium singularium imagines ab objectis emissas exciperet perciperetue, & in se reconditas adunaret defecationes, quarum interuentu rationem propriam sibi compararet, organis ad id opus indiguit. Ideo à Naturâ ornatus est omni sensu exquisitissimo, non eo tantum ad vitam necessario, sed ad lætiùs beatiùsque viuendum accommodato; tactum & gustum cæteris animantibus communem habuit longè præstantiorem, non squamis, non villis, setis, crustisue obductam cutem, sed carnem nerueam toti extensam corpori, molliorem acutioris, duriorum obtusioris ingenij indicem, ἀσθητικὸν ἀπλῶς obtinuit; linguam sortitus est non adhærentem, non duram, sed latam, mollem, expeditam, τῷ χυμῶν ἕνεκα ἐν τῷ λόγῳ. Quam hi proximo sensationem objecto, suam remoto eliciunt alij, editumque habuere locum in capite velut speculâ positi, qui excubarent, inter quos nobilior visus, vel ipsâ oculorum fabricâ spectandus; in his tam paruis quæ ratio? quanta vis? quàm inextricabilis perfectio? nec minoris commodi auditus, miris excavatus modis, ita ad disciplinam datus, vt qui eo careat à naturâ, velut elinguis nec discat, nec doceat. Postremus tandem accedit odoratus, cuius dignitas vel eo patet, quod sagaces nasutos vocent. Satis autem non est externa habuisse instru-

menta, nisi & interna concurrerent, à quibus, Cerebro scilicet, manat per nervos spiritus copiosus, limpidissimus, temperatissimus ad sensoria; tunc vis animæ sopita excitatur, exceptæ species animaduertuntur, inde vehuntur ad sensum communem, ubi distinguuntur, vt à materiæ face secretiores obijciantur intellectui, qui ad illarum velut speculi nitidissimi intuitum apprehendit præsentia, diuisa conjungit, ex prioribus posteriora colligit & concludit. Vnde hominis structura præstantior, qui licet à pluribus in quodam sensu superetur, in omnibus vincit omnia; Aquilæ clariùs cernant, Vultures sagaciùs odorentur, liquidiùs audiant Talpæ, homo rerum omnium discrimina accuratiùs dignoscit quolibet sensu, quo qui sapiùs vtitur, sensualis dicendus.

I I.

FELIX qui tanto instrumentorum apparatu instructus nouit rerum causas, quas vni Naturæ deditus contemplationi Physicus, penitiùs inuestigat. Miratur sublunarium à cælestibus ordinem; an aliunde temporum momenta, tempestatum vicissitudines, æstus maris reciproci? miratur Elementorum inter se mille modis pugnantium societatem, vnde mistorum generationes. miratur vnde pars in viiente quælibet à nullo docta, tam rectè suum opus cudad. Hinc curiosior factus, corporum materiam, formam, motum, quantitatem, terminum, locum & tempus indagar; quorum omnium, causam vnam appellat Naturam, quo nomine nihil notius, definitione nihil abstrusum magis, quóque latiùs diffunditur, eò magis ignoratur; quasi ea sit rerum indoles vt in se manifesta, cognitu fiat difficillima. Valeant deliramenta Veterum, qui quam non audent inficiari, insimulant; quid aliud Gigantum more pugnare cum Diis, quàm Naturæ repugnare? Hanc qui negas, ortus tui authorem nescis; vox sit ambigua, sit multiplex, vnum rerum omnium parentem agnosce, Deum Opt. Max. in quo velut circulo à bono in bonum jugis fit circuitus. Ab eo fluit Natura particularis, omnibus quæ cælorum ambitu continentur, certo, non promiscuo ordine indita; illam Theologus contempletur, hanc perscrutatur Physicus.

I I I.

MEDICVS præcipuo jure particularem rimatur Naturam, non illam vt principium & causam motus

3
 & quietis ejus in quo inest primò & per se, & non per acci-
 dens, quod solius Physici munus est; sed in quantum ad ho-
 minis, cui vni studet, sanitatem conducit. Ea ratione mun-
 dum peragrat omnem; modo in sublime elatus, siderum
 prosperos vel aduersos ortus & occasus prospicit: modò in
 terræ penetrat viscera, persequitur omnes ejus fibras, me-
 tallâ, & fossitium omne genus eruit arte in salutem cessura.
 Modò quicquid hæc benigna & communis Mater, vsusque
 mortalium semper ancilla fundit, quæ gremio complexa su-
 stinet, & plantas, & animalia quærit; omnium vt fiant ali-
 menta, vel medicamenta virtutes impensius scrutatur. Tot
 tantisque instructus præsidiiis ad suum aggreditur opus, cujus
 Naturæ, positæ in humido primigenio insito spiritu & calo-
 re vndique perfuso, prius apprime cognitæ vni inseruit,
 vnam rectè agentem læpe ad stuporem vique spectat, quan-
 tum potest imitatur, sopitam excitat, reuocat aberrantem,
 in officio confirmat.

I V.

SANITATEM indiuiduam comitem Naturæ, in
 justa partium similiarium temperie, concinna dissimila-
 rium conformatione, vtrarumque connexionepa positam,
 Medicus seruat præsentem similibus, sublatâ causâ morbificâ
 absentem reuocat, quod vt assequatur sensibus debet. Pri-
 mum corporis humani sectioni, propria inspectione incum-
 bit, partium substantiam determinatæ facultatis domici-
 lium, temperiem similiarium formam, illam per secundas,
 hanc per primas qualitates sensiles detegit; earum eadem
 autopsiâ contemplatur figuram, magnitudinem, numerum,
 situm, & vnionem, vnde actionem & vsum dignoscit; hæc
 solâ vt plurimum duce fouentur Naturâ: quæ si manifestè
 peruertantur, inde morbus, cujus speciem, causam & sedem,
 vir medendi peritus, actionis læsione, proprietate doloris,
 situ, excrementis, propriis accidentibus iudicat. Vnde ac-
 cersitus, auditis tum ab ægrotante, tum ab assidentibus, à
 quo tempore, quibus & quantis vexatus fuerit æger sympto-
 matis, qua methodo curatus, sensum adhibet omnem in præ-
 senti statu dignoscendo. Laboret aluina regio, omnem ejus
 ambitum in primis hypochondria pertractat, explorat lin-
 guam, excrementorum siue vomitu, siue secessu ejectorum
 consistentiam, copiam, qualitatem intuetur, inuitus odora-

tur. Malè habeat thorax, arteriam attrectat; respirationem ponderat; sputum & urinas curiosis oculis inuestigat. Quid plura? doleat cerebrum, oculos, frontem, vultum denique totum, qui tacitus quidam sermo mentis est, inspicit; audit vocem vitæ indicem; motum & sensum membrorum considerat.

V.

MORBORVM omnium causæ antecedentes plethora & cacochymia; Medicus illam venæ sectione tollit, hanc emendat pharmaciâ, vtrique diætâ succurrit. Encyclopedia sua instructus irridet occultas, occultiores suis authoribus remediorum facultates; fabulas putat incantationes, amuleta nugas, miracula sæpiùs superstitiosa negligit, suis credit sensibus, alimentorum vt medicamentorum vires non caracteris, sed odore, sapore, experientia comprobant; graui verborum lenitate auctoritatem sibi conciliat, præscribit magna præsidia, ad quæ stupeat imperitum vulgus, fideique suæ insolentium ambitiosæ vltro concederet, quod fidelissimis sensibus non potest denegare. Nec ideo impietatis insimulandus Medicus, imò secretiora quæ in mundo sunt arcana nouit & miratur, vnde Dei supremam agnoscit Majestatem & veretur, animam hominis fatetur & probat spiritalem, ideò quod sensibus deprehendatur aliud statuit actionum principium vir sensibus addictus tandem non hominem καὶ ὅλου quod sola mente concipiatur, sed καὶ ὁμοῦ, quia sensilem, curat; Inde conjector simul & certissimus artifex.

Ergo Medicus est sensualis Physicus.

DOMINI DOCTORES DISPUTAVRI.

*M. Nicolaus Bonuarlet.
M. Nicolaus Rainfant.
M. Iacobus Boujenier.*

*M. Ioannes Grou.
M. Antonius Ruffin.
M. Petrus Pourret.*

*M. Ioannes Garbe Schol. Professor,
M. Paulus Courtois,
M. Petrus Meriau.*

Proponebat Lutetiæ CAROLVS MARTEAV
Laudunæus, A. R. S. H. M. DC. LXIII.

PARISIIS,

Apud FRANCISCVM MGVET Typographum Regium, viâ
Citharæ, ad insigne Adorationis Regum.